



ENRIKE ZUAZUA

## Kataluniako azkenaurreko jokaldia

1997an IBMk garaturiko Deep Blue (Urdin Sakona) ordenagailuak Gary Kasparov munduko xake txapeldunari irabazi omen zion. Gauzak ez daude oraindik horren argi. Kasparov-ek IBM-ri tranpa egin izana leporatu zion, makinak gizaki baten aholku gehigarria izan ote zuen susmatuta.

Eta gauzak ez ziren guztiz argitu. Aurten Google-k garaturiko AlphaGo ordenagailuak Go jokoaren Ke Jie munduko txapeldunari irabazi dio zalantzarik gabe. Bai ordenagailu batak bai besteak erabiltzen duten jokoak Inteligentzia Artifizialaren algoritmoetan oinarrituta daude.

Gaur egun zalantza gutxi geratzen dira. Arau logikoen jokoetan makinak, azken batean, gizakia gaindituko dute, ez baitago dagoeneko, eta are gutxiago etorkizunera begira, mugarik makinak duten kalkulatzeko gaitasunarendako. Makinek jokaldi posible anitz gehiago aztertzeko gaitasuna izango dute, hurrengo jokaldietan beraiek izan lezaketen ondorio posible guztiak aztertuz. Horrek ematen duen abantailarekin gizakiarentzat asmatezinak diren jokaldiak sortzeko gaitasuna izango du makinak, azkenik garailu bihurtzeko. Gaurko makinak Goliath erraldoia dira eta gizakia, ordea, David nanoa. Eta Davidek gutxika-gutxika horrelako partida guztiak galduko ditu. Badira, hala ere, beste esparru batzuk gizakia irabazle den eta beti izango den, sormena artean denean. Gaur egun, oraindik ere, gizakiak sorturikoak dira margo, abesti eta olerki ederrenak. Egun hauetan harrituta jarraitzen ari gara Katalunian jokatzeko ari den partida.

Hedabideetan ez da leku askorik geratzen beste albisteetarako. Politikariak, parlamentuek, gobernuak, polizia, autzitegiek jo ta ke ari dira. Batzuk erreferenduma egiteko nahian eta beste batzuk berau ekiditeko. Nahiko argi dago nor den Goliath eta nor David joko horretan. Partida honen azken jokaldia urriaren 1ean jokatu da Kataluniako kaleetan. Baina ez da hori azken partida izango. Urriaren 2an seguruenik Espainiako estatuak ez du bere osotasuna galduko, baina bere aniztasunaren adierazleak nabarmenagoak izango dira guztien begietan. Orduan hasiko da partida berria. Jokalari biek nekea gainditu, bakoitzaren arrazoibideak orraztu eta etorkizun berriaren bila lanean jarri beharko dira, elkarrekin. Bakoitzaren aurreiritzi eta pasioak baztertu, pragmatikoki aritu beharko dira adostasun esparru eta eremu berriak garatzen. Goliath ezin du partida hori irabazi Daviden borondatearen eta sentimenduen kontra. Eta gaur irabazteak, paradokiko, ahuldu egin lezake gure Goliath erraldoia. Makinak ez du oraindik gizakiaren ahalmen sortzailea gainditu. Eta idatziriko legeek ezin izango dute gure gizartearen etorkizunaren zabalasuna mugatu.

## Maite Narbaiza Atzegiko baillarako arduraduna izandakua hil zan astelehenian

Astelehen gabian hil zan, 71 urterekin, Maite Narbaiza euskaltzalia eta 16 urtetan Debabarreneko Txolartietako arduraduna izandakua. Badira urte batzuk Maite eibartarra Soraluzera juan zala bizitzera eta handik, Eibarren aurretik egindako moduan, parte hartu izan zeban gizarte maillako hainbat ekimenetan, arlo sozial, kultural eta politikuan, guztietan be biharra egitteko konpromisuari lotuta. Berbalagun ekimenian hartu zeban parte, euskaldunbarririk euskara mailla hobetzeko ahaleginiñan eta, euskalduna eta euskaltzalia izatiaz gain, gure baillarako Atzegi alkarteko arduraduna izan zan 16 urtietan eta, gitxiagotasunak dakenen aldeko bere jardunari esker, Eguneko Zentrua zabaltzia be lortu zeban; horrez gain, Deparkel Parkinson Elkartiarekin egiten zeban lan. Politikan be jardun zeban eta, Soraluzen Eusko Alkartasuneko ziñegotzixa izan zan hainbat legegintzalditan, eta baita Bilduko Kontseilluko kidia be.



## Menpekotasuna daken sendiak zaintzen dittuenendako ikastarua

Udalak eta Diputaziñuak alkarlanian antolatuta, menpekotasunen bat daken sendiak zaintzen dittuenendako doako ikastarua eskinduko dabe urritik azarora. Sendian programaren barruan egingo dan taillarra sei saiokua izango da eta Portalean emongo dabe urriaren 2, 9, 16, 23 eta 30ian eta azaruaren 16xan, 15.00etatik 17.00etara.

Matia Fundaziñoko adituak arduratuko dira klasiakin eta zaintzailliendako lagungarriak izan leikiazen gaixak, orotarikuak jorratuko ditue. Ikastaruan parte hartzeko izen-emotia



Pegoran izango da, iraillaren 28ra arte. Bihar dan moduan beteta aurkeztu biharreko agiri-xa Pegoran eskatu leike edo, bestela, Udalaren webgunian ([www.eibar.eus](http://www.eibar.eus)) be dago eskuragarri.

## Kamiseten zozketarako txartelak saltzen hasi dira

Amañako Jai Batzordiak SGAErekin (Egile eta Argitaratzaileen Elkarte Orokorra) dakan 40.000 euro inguruko zorra pagatzeko dirua lortzeko asmuarekin, foballeko jokalaria famatuen kamiseten zozketia antolatu dau Maite Markuerkiagak. Danera 180 bat sari banatzeko asmua dake: sari gehixenak jokalarixen kamisetak izango dira, ixa guztiak siñatutakuak, baiña baloiak eta beste materixal batzuk be oparituko ditue. Aurreko zapatuan hasi ziran txartelak saltzen eta, lehelengo eguneko salmenteri laguntzeko asmuarekin, Untzagan 70 bat maniki ipiñi zittuen, oparituko diran kamisetak jendiak ikusteko. Txartelak 2,5 euro balixo dabe eta baktotxian bi zenbaki dagoz. Koxkor, Kultu, Kontent eta Ongi Etorri tabernetan erosi leikez. Zozketia, barriz, San Andres egunian egingo dabe, notarixo baten aurrian. Bestalde, azaruaren 19ra arte kamisetak Untzagako jubilau etxian ikusteko moduan egongo dira, han ipiñi daben erakusketan: barixakuetan 19:30xetatik 21:30xetara zabalduko dabe eta zapatu eta domeketan 10:00etatik 14:00xetara.

